

潞安府志卷二十四

人物六

循良

漢

馮遂字子產奉世子通易太常察孝廉爲郎補謁者建
昭中選爲復土校尉光祿勳于永舉茂才爲美陽令
功次遷長樂屯衛司馬清河都尉隴西太守治行廉
平年四十餘卒爲都尉時言河隄方畧在溝洫志

馮立字聖卿左將軍奉世子通春秋以父任爲郎稍遷
諸曹竟寧中以王舅出爲五原屬國都尉數年遷五

原太守徙西上郡立居職公廉治行畧與野王相似
而多智有恩貸好爲條教吏民嘉美野王立相代爲
太守歌之曰大馮君小馮君兄弟繼踵相因循聰明
賢智惠吏民政如魯衛德化均周公康叔猶二君後
遷爲東海太守下濕病痺徙太原太守更歷五郡所
居有政跡年老卒官

鮑德昱子修志節有名稱累官南陽太守時歲多荒災
唯南陽豐穰吏人愛悅號爲神父郡學久廢德修起
黌舍備俎豆黼冕行禮奏樂又尊饗國老晏會諸儒
百姓觀者無不勸服在職九年徵拜大司農卒於官

北魏

馮龍上黨人仕魏爲魏州刺史有善政蝗不入境人以爲廉明所感

元

宋思齊屯留人以儒吏兼通歷仕至陽武縣尹爲政尙德化不事鞭朴有古循吏風

明

王士宏潞州人洪武庚午舉人知浙江寧海縣時方氏初平籍溫台明三郡兵黠者竄平人其中士宏曰奈何誣民爲兵抗疏言其狀詞甚切事得寢尋遷南雄

府判官卒于官三郡之民悲思之事載薛方山憲章錄

王蕢屯留人登洪武丁丑進士授定興知縣因逗留中貴調虞城居官多惠政民懷其德發奸懲暴巨猾皆歛跡竟被閹宦中傷罷官時論惜之

趙泰字熙和潞城人永樂中由舉人入監歷事都察院授常州府同知有廉惠聲濬孟瀆得勝二河作魏村閘諸所興築民無言勞者周忱與况鍾議減重糧泰亦檢常州官田租請並減之遷工部郎中命塞東昌決河沈薦爲協同都運益勤其職尋卒

劉昭字克明潞州人宣德丁未進士正統辛酉擢南給事中糾舉秉公不避權要除宦官監收倉糧之害奏嚴皇城門禁戊辰以大臣薦知臨洮修學宮闢荒蕪捐俸賑飢平反冤獄臨洮人士作歌頌之

趙偉字士奇潞州人正統戊午舉人授開封府同知巡撫于謙薦衛輝府知府未任艱歸補萊州府同知二年遷青州府知府值旱荒飛蝗蔽天禱於神大雨如注蝗盡斃民一家三人悉坐死擇其稍輕者活之使得有後洫政八年壇壝廟學以次修舉後以朝會入都抗疏致仕優游里巷中歷十餘年卒子汝章貢士

任教授

王紹屯留人正統乙丑進士累仕廣東副使居官多異政部民服其明察學閥淵博爲時所推

劉潔字清之襄垣人端子景泰庚午舉人任廣東道監察御史數上疏言事從征荆襄間運籌決勝功最著遷浙江副使老成持重洞達機宜雪獄救荒清鹽理漕悉井井有條理尋卒於官以孫龍貴贈南京吏部尚書所著有一庵集子鳳儀進士鳳鳴舉人孫龍夔王春屯留人學純行潔以貢士歷仕至陝西叅政歸之日行李蕭然一時皆服其清操

楊能壺關人姿儀環秀有才識天順己卯舉人授東昌府同知在任廉明譽徹上下時有妖言連逮千餘人皆抵死能力辯得釋陞本府知府以幹濟稱子奇另有傳

廉政字養民潞州人天順己卯舉人任安邱知縣仁惠著聲調澠池值歲祲餓莩枕藉悉心拯救先是主者失于告灾征且迫政以狀聞得蠲卹全活萬計時司馬戚屬官洛陽貪虐大著監司屬政按訊遂律其罪又以事忤按巡意政曰吾寧坐免殃民蠹政所不敢爲竟以獲罪歸民咸思之

趙博黎城人天順壬午解元成化十四年進士歷官刑部郎中陝西鳳翔知府執法不撓作郡有聲稱子初詳孝義

楊奇字秀夫壺關人能之子成化辛丑進士授戶部主事宏治改元上裕國安民疏極言足食足兵之法在端本澄源進陝西司郎中時甘肅弗靖奇奉勅整督軍餉將行上疏言備邊七事上嘉納之尋陞嘉興知府改夔州有惠政民飲江水遠汲爲難鑿井得美泉以姓名之夔人感慕爲作生祠

侯壘長子人宏治己酉舉人任白水知縣嚴明能斷案

無留牘先是邑多逋賦墾督催有法民皆樂輸尋調
澄城縣白水民思之祀名宦累官河南僉事致仕歸
劉鳳儀字天瑞襄垣人潔長子宏治庚戌進士授高密
知縣興學校廣儲蓄彌盜賊招撫逃亡二十餘家旱
蝗爲文自責蝗入海死陞戶部主事遷刑部員外郎
楊洛森次子河弟嘉靖壬午舉人任山東單縣知縣縣
濱大河條備河策於上官一時稱便時游宦有周恩
單文彪者貧而故洛力爲殯殮且賻其家居二載單
民樂其廉平未幾改官渭源父老送者皆泣下至渭
後教民禮讓興水利弭虎患士民愛之有渭川八政

之咏以疾卒於官邑人哭之如私親云

張美長子人嘉靖戊子舉人授鎮原知縣值歲歉殫力賑濟多所全活再補公安條議興革不遺餘力會邑災拜禱大雨滅火調蠡縣以病歸所至有去後思

高崙字北川長子人嘉靖辛卯舉人任河南輝縣知縣歲大祲力請于上一切逋負盡蠲民以是德之

李延康字允吉長治人進士延馨弟嘉靖壬辰進士授汝寧府推官有剛直聲擢監察御史按陝西再按順天發奸摘伏稱廉平出爲河南僉事陝西叅議治汝寧豪獄及商雜礦徒皆不肯濫及無辜後以湖廣叅

政告歸卒延康祖安定知縣翦父雒南縣丞併皆有
遺愛在秦中延康兩蒞其地秦人感嘆益追慕其祖
父不置子如松舉人衡州知府

周欽字克敬長治人以貢士知陝西咸陽縣遷歸德府
通判性儉樸政以仁恕爲先官秦中七年城郭廨學
橋梁圩堤無不畢舉而均田一事尤愜輿論嘗攝篆
鄰邑亦必籌久遠在預惠安伯以椒房親占民田七
百頃悉勒歸本業以積勞乞休不允欽徑去諸大吏
請諸朝令致仕

趙希夔字一卿潞州人父秉中陝州同知博雅有時名

希夔嘉靖乙未進士任安州知州歷官河南左布政使以藩親不得爲京官加食正一品俸且開散官廕子之例方爲州時僅弱冠嘗督堤工水大至衆皆驚散乃獨立衝所衆還兢築堤得不壞時世廟南巡所經多獲罪安肅知縣逃當道以希夔攝之設黃布爲行宮供億無異物上甚喜同知東昌時值獻后梓宮南下中人護喪郡縣苦之臨清知州亦逃當道又以攝州據理應酬中人悅服銅仁小平茶苗叛官軍征之不服希夔時在貴州以他道署事撫按以兵事屬焉賊退入深箐兵不得進乃爲砲駁望烟飛擊賊逾

深遁遂伐木開道入其穴授苗豪安天朝以方畧使
立功贖罪苗遂平拓地二百里蒙賞金幣爲藩泉長
以和馭下有趙佛之稱致仕歸絕請謁勸化鄉人隨
分歸善壽八十七而終子三子實儀賓于敏官至知
府于樸貢士

張奇字尙中長子人美之兄嘉靖甲午舉人任北直新
城知縣縣當孔道供億繁難公以民力不支調停省
約忤中貴人意遂中傷之竟被黜百姓感慕不忘爲
建生祠

程應登字司晉潞州人幼負異質遊李侍御漳埜門與

任光祿輩相切劘又主陵川宗約教以詩文著弱冠
中嘉靖庚子舉人授睢州知州補延慶州所至嚴請
託絕賂遺兩任咸以守制歸里制終乃浩然嘆曰向
爲親出今可已矣遂不赴補以孫正已貴贈兵部右
侍郎

郝良臣字廷蓋襄垣人登嘉靖辛丑進士授長垣知縣
甫抵任卽開通河渠爲民增堡砦實義倉察奸詰暴
境內大治蘇巡撫翁御史交章薦之會有詔徵取垣
人爲立生祠陞吏部驗封司主事累仕太僕光祿寺
卿出爲江西右布政使以剛直忤當道落職不復起

著有襪線集

李尙智字子愚屯留人嘉靖甲辰進士知直隸清苑縣
擢監察御史轉山東青州知府直隸密雲副使補四
川叅政山東按察使晉右僉都御史巡撫延綏調保
定尙智蘊經世畧居官以廉潔爲先而出以公愼自
郡縣至開府所至皆有惠政在延綏控致五路讐伏
諸番尤稱一時屏翰致政後家無長物布衣蔬食稱
貸自給怡如也當道數十薦皆不起世以清望推之
楊世卿長子人幼有至性知崇正學聞李漳野先生講
學于潞布衣徒步執隻雞爲贄先生與其誠而進之

遂得心性之學嘉靖丙午舉于鄉任直隸沙河知縣
隴州知州累仕至南京戶部郎中居官行政本于一
誠故所至得民當隴州考滿入覲道由沙河舊民預
探十許日比至空城迎接黃白扶輿歡聲滿路攀留
數日以飛車送入都中其德政及人多類此孫采鄉
舉

姚九功字惟叙襄垣人嘉靖丁未進士授許州知州操
持廉慎政務嚴明吏畏民懷有姚曹二公生祠陞刑
部員外郎多所平反旋爲固原兵備副使軍民繪像
入督府遺範祠祀之歷本省右叅政經理涼莊邊務